

NOOR AINULYAKIN MOHAMAD ISHAK
noor.ainulyakin@sinarharian.com.my

Jakim realisasikan perpustakaan masjid

Sejarah menunjukkan bahawa perkembangan perpustakaan masjid bukan satu fenomena asing dalam tradisi keilmuan Islam. Menyempak perkembangan awal sejarah tamadun Islam, khasnya dalam pemerintahan Bani Umayyah dan Abbasiyah, perpustakaan masjid memainkan peranan yang amat penting dalam perkembangan ilmu dan tamadun Islam.

Hampir semua universiti dunia Islam juga telah lahir daripada perpustakaan masjid, termasuklah universiti al-Azhar di Mesir. Ini menjadi tanggungjawab pihak kerajaan dalam membina tamadun ummah ini dengan menjadikan masjid bukan sekadar tempat beriadah, namun harus diperluaskan skop yang lebih besar merangkumi semua aspek pengurusan kehidupan dari semasa ke semasa. Justeru, Jabatan Kemajuan Islam Malaysia (Jakim) buat julung kalinya mengadakan Persidangan Perpustakaan Masjid Peringkat Kebangsaan 2012 di Universiti Islam Antarabangsa (UIA) untuk menjadikan perpustakaan masjid diarahkan di negara ini, baru-baru ini.

Ketua Pengarah Jakim, Datuk Othman Mustapha berkata, persidangan tersebut diadakan kerana belum pernah lagi pihak Jakim mengadakan persidangan yang khusus seumpama itu. Hakikatnya memang banyak perancangan dan program Jakim untuk memartabatkan institusi masjid, sama ada daripada dasar Jakim sendiri atau kerjasama dengan pihak lain.

Menurutnya, perbincangan mengenai perpustakaan masjid ini pernah dibincangkan dalam Konvensyen Pengurusan Masjid peringkat negeri Sabah yang diadakan pada Disember 1995.

"Saya melihat amat wajar perpustakaan itu diimplementasikan secara sistematik di masjid-masjid seluruh Malaysia.

"Sesungguhnya persidangan kali ini bukan sahaja untuk kita capai kata sepakat atau membuat keputusan akan tetapi ia dapat mengeratkan silaturahim malahan dapat bertukar-tukar fikiran bagi mencetuskan idea baru serta mencari pendekatan terkini yang lebih efektif untuk menjadikan masjid sebagai pusat ilmu, tamadun dan perkembangan ummah," katanya.

Tumpuan utama

Othman berkata, Jakim sentiasa meletakkan pengurusan masjid sebagai satu aspek pengurusan hal ehwal Islam dan agenda pembangunan ummah.

"Bahkan tadbir urus institusi masjid diletakkan sebagai perkara kedua dalam senarai 10 agenda kritikal yang diberi tumpuan utama.

"Keutamaan Jakim melihat masjid berperanan sebagai tempat ibadat, pusat ilmu, budaya dan tamadun Islam, pusat kebajikan serta menjadi syiar kepada kemuliaan Islam," jelasnya.

Bagi merealisasikan harapan tersebut kata Othman, masjid dirancang supaya menjadi

sebuah institut yang melaksanakan tadbir urus masjid dengan berkesan melalui perkhidmatan, pendidikan dan pusat rujukan.

"Institusi masjid dapat mempamerkan ciri-ciri unggul dalam semua aspek termasuklah daripada segi kebersihan dan penyelenggaraan, khidmat layanan kepada pengunjung dan penyediaan maklumat terkini.

"Mudah-mudahan ia menjadi titik permulaan bagi menjadikan

masjid sebagai pusat perkembangan ilmu dan tamadun ummah," ujarinya.

Jakim sentiasa menggunakan pendekatan perkongsian hasrat dan persefahaman dalam mana-mana pihak atas apa jua program untuk memperkasakan dan menginovasi fungsi masjid sebagai ikon pengurusan Islam serta pusat pembangunan ummah.

"Tanpa kerjasama seumpama ini,



OTHMAN

mustahil segala misi dalam mengimarahkan masjid berjalan lancar. Jakim sentiasa berusaha untuk mewujudkan institusi masjid yang unggul dengan memperkenalkan Standard Penarafan Masjid Malaysia.

"Terdapat empat komponen utama yang digariskan dalam standard ini meliputi aspek pengurusan, pengimarahkan, kemudahan prasarana dan persekitaran. Sistem ini bertujuan untuk menilai fungsi dan peranan masjid seluruh negara," katanya.

Perlukan perubahan

Othman berkata, berdasarkan kepada pemerhatian didapati perpustakaan yang ada di masjid pada masa ini hanya sekadar bersifat bilik bacaan, tanpa dilengkapi dengan peralatan yang lengkap dan buku terkini.

"Mengikut laporan artikel *Library Journal* oleh Renee Feinberg

mendapati remaja pada hari ini lebih gemar mengunjungi kedai buku daripada perpustakaan.

"Ini kerana, di kedai mempunyai buku terkini, lebih khusus, koleksi banyak dan mencukupi," jelasnya.

Bagi menjadikan perpustakaan masjid diminati, maka sewajarnya suasana perpustakaan perlukan perubahan, perlu dilengkapi dengan segala kemudahan.

"Seperti kemudahan komputer, teknologi komunikasi maklumat dan pelbagai jenis buku yang terkini di samping susunan rapi di tempat bersesuaian.

"Lokasi perpustakaan juga perlu dititikberatkan di persekitaran masjid agar ia mudah untuk dikunjungi," katanya.


Tingkatkan fungsi masjid sebagai pusat ilmu



Jadikan perpustakaan masjid setanding perpustakaan lain. - Gambar hiasan



Universiti al-Azhar antara pusat ilmu yang bermula dari perpustakaan masjid. - Sumber internet



Masjid Negara antara yang memiliki perpustakaan sendiri.

INFO

Statistik menunjukkan sehingga kini sebanyak 6,119 masjid dibina di seluruh negara sama ada di bawah peruntukan kerajaan persekutuan atau negeri. Bagaimanapun daripada 180 perpustakaan Islam yang disenaraikan, terdapat 64 perpustakaan masjid. (Kajian oleh: Balqis Shuja' Islamic Librarianship and Malaysian Islamic libraries, 2011).

Sumber: Sinar Harian, Jumaat 30/3/2012 : Pg 3 (Sipren Rehal, Sipren Rohani)